

Tidak puas hati penjelasan 'derma' RM2.6 bilion, mahasiswa mahu protes di Parlimen
The Malaysian Insider
August 21, 2015
Oleh Yasmin Ramlan

Gerakan Mahasiswa Selamatkan Negara (GMNS) hari ini memutuskan untuk mengadakan #LangkahSiswa sebagai satu tindakan permulaan protes terhadap kegagalan Perdana Menteri Datuk Seri Najib Razak beri penjelasan berhubung skandal dana RM2.6 bilion yang masuk ke akaun peribadinya.

Pengerusinya Muhammad Luqman Nul Hakim Zul Razali mengumumkan protes tersebut akan disertai 100 mahasiswa di depan Parlimen pada Isnin depan.

"Tindakan ini merupakan tanda kehilangan kepercayaan mahasiswa terhadap Najib sebagai perdana menteri Malaysia.

"Ini kerana sebagai pelapis kepimpinan negara, mahasiswa merasakan isu ini bukan kecil yang boleh dipandang enteng. Ini merupakan isu besar yang boleh menggugat masa depan negara.

"Mahasiswa merasakan perlunya satu tindakan bagi mengembalikan semua keadaan negara pada kondisi yang lebih baik bagi memastikan kebajikan rakyat serta masa depan negara terjamin" katanya pada sidang media di luar ibu pejabat Bank Negara di Kuala Lumpur hari ini.

Sementara itu, Ahli Gerakan Demokratik Belia dan Pelajar Malaysia (Dema) Lau Yi Leong yang turut bersama ketika sidang media di luar ibu pejabat Bank Negara Malaysia (BNM) itu berkata, protes pada Isnin depan mengharapka agar 3 tuntutan dapat dicapai.

Pertama, menggesa Najib meletakkan jawatan sebagai perdana menteri; kedua, mendedahkan kesemua keputusan siasatan BNM, Suruhanjaya Pencegahan Rasuah Malaysia (SPRM) dan Jawatankuasa Kira-kira Wang Negara (PAC); dan ketiga, mengadakan perjumpaan formal antara mahasiswa dan ahli Parlimen ke arah penubuhan kerajaan peralihan.

Luqman juga menyeru dan mengajak seluruh mahasiswa, pelajar, anak muda, dan rakyat Malaysia bersama-sama dalam protes ini.

"Keadaan politik negara kini semakin panas dan mendapat tumpuan seluruh dunia. Bermula dengan krisis 1MDB melibatkan pemimpin tertinggi negara, kemudian menyaksikan berlakunya pemecatan dan tangkapan serta banyak lagi perkara yang mencacatkan sistem demokrasi negara dek kerana kerakusan seseorang yang cuba mempertahankan survival politiknya sendiri.

"Perkara ini akhirnya memberi kesan kepada ekonomi negara sehingga berlakunya

krisis ekonomi. Kejatuhan mata wang berpunca daripada situasi politik Malaysia sekarang," katanya. – 21 Ogos, 2015.

Copyright © 2015 Edge Insider Sdn Bhd

Source:

<http://www.themalaysianinsider.com/bahasa/article/tidak-puas-hati-penjelasan-derma-rm2.6-bilion-mahasiswa-mahu-protes-di-parl>